

U CELLULARE

(dialetto calabrese)

Oramai ci l'hanu tutti,
picculi e ranni, bieddri
e brutti: 'un ne pò fare
a menu cchiù nessunu.
Messaggi, video, foto,
fèisbuk, tuitter, guozzàp
n'hanu canciatu a vita:
mo simu cchiù civili!
Te capita 'e vidire pper a via
ncunu chi parra sulu.

Si sagghi subra a Metro
o n'autobus a Roma, facce casu,
'un truavi cchiù cristiani
chi lèianu u giornale,
ma truavi marziani tutti 'guali,
ccu u *smarfon* a ra manu
e l'uacchi subra u schermu
illuminatu e caricu 'e riflessi.
Oje,
simu tutti connessi,
simu intra a stessa rete cumu i pisci!
Oje, nessunu cchiù se senta sulu:
ccu u cellulare u munnu
'u tenimu intr' u pugnu!

Mo sente ch'è successu l'atru juarnu:
n'amicu mio prievite
e parracu stimatu
l'hanu truvatu muartu
'n terra, arret'a porta
da casa, intra 'na pozza
'e sangu; a ra manu
tenìa ru cellulare:
avia chiamatu ancunu ...
si, ha cercatu aiutu,
ma nessuno è accurrutu ... era dde notte!
È muartu sulu sulu
e senza nu cunfuartu.

U cellulare, certu,
è signu 'e civiltà e de progressu:
annulla re distanze
e duna sicurezza,
amplifica ra vucca
e allariga l'aricchie ...
ma u core?
Si u core ud è connessu,
a chi serva ru progressu?
